

四庫全書

集部

欽定四庫全書

茗溪集卷三十八

宋 劉一止 撰

外制

鄭剛中秘書少監

勅具官某中秘書之藏其屬皆一時人物之英朕所
樂育以待用者也平居商確古今考稽得失論議切磨
叅錯後先非文行兼優過人數等朕不使爲之長也爾
志節端亮見於踐更强識博聞足以華國茲用命爾領

袖衆俊優游書史之間其自今

闕

馬可

王次翁起居舍人

勅具官某柱史之任其選甚高進直殿坳職書言動綴
兩禁近臣之列為一時儒者之榮匪曰能賢將焉稱此
爾學通以博氣粹而剛蓄養亭涵不求近用天官之屬
冊府之貳踐更未幾譽望已孚載錫命書俾司記注往
其祇服益勵爾修可

方庭實宗正少卿

勅具官某自昔帝王施德于宗族厚矣抑有政焉在堯
稱敦叙之仁于周有辨親疎之義政在司宗理當遴選
以爾文行之懿咸有古風氣識之高不求近用輟從六
察擢貳列卿爾其廣朕親睦之恩而謹其序錄之事則
為稱職尚勉之哉可

右宣義郎丘奐等充二京淮北宣諭司屬官各
先轉一資

勅具官某朕惟二京生靈久隔謳吟之俗思見漢官爰

授使指宣道至懷爾等從行皆以才選稍進官秩以示寵光尚其勉之可

鄭謨差從郭仲荀前去東京特與橫行上轉

行一官

勅朕惟王畧治及舊都委任近臣往司管籥惟時僚屬悉聽選掄具官某有位於軍見推忠孝肅持軍律式位其行序進橫階是為異數服我休命益勵爾修可

李誼中書舍人兼直學士院兼侍講

勅唐虞之制莫尚於坦明商周之書獨稱於灑噩蓋斯
文之興替關治道之汙隆惟茲播告之修不匿厥指則
若卜筮之事罔不是孚代言之難於斯為重具官某學
探聖域文有古風頃以時髦薦更親擢肅憲綱於臺察
盡規益於棘垣拳拳致主之忠表表濟時之畧載稽公
議益簡朕心用錫贊書就陞辭掖兼禁林之典冊侍經
幃之深嚴非爾之能其誰有此尚思稱塞以對寵休可
楊應誠落致仕差充提舉京城四壁檢察諸門

兼節制軍馬司叅議官

勅大夫年高則告老於朝不以官職之事累焉古之制也至于精爽未衰忠義內激與國休戚獨能忽然如秦越人之相視哉具官某智識不羣親賢好義廉靖之操有如冰霜服在近班見稱忠謹挂冠神武亦復淹時屬中都之既寧委近臣而居守眷爾養恬之久起於得謝之餘俾贊軍謀往固封守魏公雖老尚堪一行馬援據鞍故可矍鑠體朕至意益恢遠圖可

張浚復資政殿大學士充福建路安撫大使兼

知福州

勅朕當饋思賢劇安危之注意殿邦作牧賴文武之兼
資乃眷邇臣實惟舊德肆頒名命庸示寵私具官某篤
實思和剛明卓偉忠可貫于金石信自通于神明許國
以來視身何有相朕艱難之際備殫夙夜之勤功在王
家事藏盟府慨念投閑之久屬當謀帥之初惟長樂之
輿區蓋七閩之重鎮耕桑阜盛民俗安恬欲並協於師

虞宜莫如於宿望通籍秘殿增光元戎風物不殊曾是
經行之舊旌麾所指共知條教之新勉為朕行徒得君
重可

勾龍如淵罷御史中丞提舉宮觀

勅朕于廢置予奪之命若天地之化春生秋殺未嘗有
心至於子大夫自有罪朕亦不得而私焉具官某頃以
時才儀於要路粵自詞掖執憲中司庶幾肅將紀綱以
警有位而狂言之發乃在爾僚事既稽於上聞忿實由

於交惡頗失近臣之體難逃不敏之愆免所居官奉祠
真館其思循省毋重悔尤可

故嗣濮王仲湜婿承節郎孟思恭可閣門祇候
免供職

勅具官某上閣之職號稱華要選擇惟遴不以假人爾
以王邸之親獲膺是寵其思自飭以稱所蒙可

右迪功郎張楹前任錢塘尉賣鹽增倍循一資

宋林同
此詞

勅具官某爾奉職恪勤應於賞格進階之寵用勉後圖
可

左朝議大夫充祕閣修撰徐公裕因赦叙元降

一官

勅具官某爾坐累貶秩名在丹書念頗閱於歲時亦既
更於蕩宥俾從甄叙茲乃彝章服寵惟新尚圖稱塞可
侯公達暴露賞轉一官

勅具官某曩者大將出師蕩平寇孽區薄夙露爾亦良

勤序進一官是為殊寵可

周聿充陝西路宣諭使乞差蓋閱張致平充准
備差使先次轉一官

勅具官某我有使指往臨西秦惟時從行悉聽自擇進
官之榮用勸爾勞

留守辟則云留都
之重我得信臣

監進奏院羅萬楊適各降一官

勅具官某爾等奉職不審事乖後先貶秩之愆蓋其自
速尚知循省以勵后圖可

承節郎陳仕澄詭詐圖利依斷降一官

勅具官某爾率情忘行事由規利比從吏議罪涉已私
故褫一官以戒不韙可

右宣義郎張澹前知吉州萬安縣輟差弓手監
欠稅人致阿陳等鎖索遺火燒死事依法寺

斷降一官衝替

勅具官某爾為縣大夫視民如寇至遣鄉兵程督賦人
事生意外職汝之由免所居官貶秩一等是為寬典其

務省循可

李綱知潭州兼安撫大使 改除宮祠

勅入摠百揆作股肱耳目之臣出殿大邦號禮樂詩書
之帥任是安危之責孰踰耆舊之賢具官某識洞幾微
氣全英特修身自昔非孔孟之言不師許國以來惟伊
呂之心是志屢展經綸之學寔兼文武之資忼慨百為
夷險一意方且辭功名而不有占藪澤之自娛未忘憂
國之風忍袖濟時之手眷長沙之巨屏居南紀之上游

地控荆湘勢臨吳楚惟威聲之先暨奸慝自消矧條教之舊孚歌謠猶在淮揚之徒得君重其勿留行方叔之克壯其猷豈能無望祇服朕訓有光前聞可

郭仲荀男武翼郎閣門宣贊舍人及之換授右

通直郎

勅具官某爾以文任得官升華上閣亦既榮矣時方右武爾獨慕文勉狗厥私是為異數可

忠訓郎王穀乞改正轉官別給告命

勅具官某爾昔者以勞進官有司過差致乖秩序茲從
更定申以書命可

秉義郎陸甫特除閣門祇候

勅具官某上閣之職日侍禁嚴右選之華無以易此爾
才能小異膺受寵榮宜勵厥修以圖稱塞可

茗溪集卷三十八

欽定四庫全書

苕溪集卷三十九

宋 劉一止 撰

外制

修武郎曲慶祖等差充陝西六路宣諭司幹辦
官先次各轉一官

勅具官某朕以全秦之地久隔王靈肆命近臣宣道至
意爾為山西將種世濟忠孝其佐而長往殫厥勤序進
一官以為爾寵可

左承務郎程邁差充趙士儂祇謁陵寢屬官先
次轉一官

勅具官某朕念陵寢汎掃久稽肆命宗英往祇厥事爾
等咸以才選往佐其行序進一官以為爾寵可

右朝議大夫直徽猷閣李弼孺可落職永不與
堂除差遣

勅具官某爾曩以愆尤事存白簡召從閒散權試使令
於汝厚矣遜夷急病古有格言就易辭難誰不樂此削

籍內間以戒妄庸可

張宦駕部郎中

勅具官某文昌政事之本而郎官上應列宿其選甚高
非一時真才不以輕授爾問學該洽行義潔修名實周
行專司輦乘輿馬之政事簡職要所以優賢尚其勉之
可

馬延之大理寺丞

勅具官某刑者例也一成而不變故君子盡心焉汝志

行清修卓爾不羣肆命汝為廷尉之屬惟明克允無失厥中則予汝嘉可

宋輝復祕閣修撰除京西路轉運副使

勅具官某畿甸之右都邑相望賦入浩繁雄視他路軍興以來政令廢格謳吟父老思見漢官必得慈惠明察之臣省觀風俗問所疾苦布宣德澤以慰斯民朕心庶幾焉以爾才任撥煩用罔不濟忠能體國事靡辭難復陞論撰之華命摠輸將之寄佇觀成績嗣有褒寵可

郭浩除龍神衛四廂都指揮使陝西宣諭使

勅朕眷惟秦隴久隔王靈通好殊隣既有息兵之約可
無虜使往宣問俗之恩具官某義勇冠軍精誠許國奮
猶將種能襲世勞顧契濶以淹時豈懷歸之不欲今朕
有命惟爾克將慰父老之謳吟道朝廷之德意俾皆諭
指宛若親臨爰陞環列之崇用侈軺車之寵是為異數
毋或留行可

樓炤除兼侍讀

勅朕長育英才實之華近將使左右前後罔匪正人從容帷幄之間細繹聖賢之蘊謂天下之樂無以加焉具官某該貫六經沈涵百氏淵源所自不愧古人仰惟祖宗垂裕後嗣具存謨訓奉以周旋爰資誦說之明以發見聞之蔽益者三友非汝而誰可

蕭振兼侍講

勅朕思得耆艾魁壘之士寘諸左右考稽疑義敷繹古今究治亂之所以然如漢虎觀故事增其所未聞信其

所已得顧黃卷中自有樂地不可忘也具官某養氣邃
深植學淹貫周知事物之變盡見聖賢之書用以談經
宜探蘊奧勸講之任舍爾其誰尚思切摩之工以副簡
求之意可

趙鼎知泉州

勅朕履運艱虞省躬祇懼默通上帝旋聞悔禍之期嘉
與斯民共享消兵之福肆頒慶賚均逮臣工矧予舊弼
之賢敢後拜州之寵具官某器宇剛特謀猷深通達

事機夙負敢為之畧執持魁柄既更再入之榮方注意以仰成遽露章而引去眷泉南之名郡實閩嶠之奧區分此顧憂莫如宿望噫朕任四方父母之責念慈惠之當先爾居千里師帥之隆宜德威之並立益恢治具無俟訓言可

程邁磨勘轉左朝議大夫

勅國朝稽堯舜考績之規叅成周計吏之法雖黜陟誅賞不由此途而階秩序進三歲聽遷一定而不易抑無

所私焉具官某法從老成才德俱茂植立中外聞譽蔚
然會課三銓就官一列茲亦知勞之賜豈惟閱日之勤
往哉欽承毋墮乃力可

李竊廣西提刑

勅具官某御史出使布宣德澤廉察吏奸求民之瘼威
聲所暨山嶽可搖爾頃以才稱旋見錄用遣臨江右綏
靖寇攘而乃督戰無謀亡失吏士肆命爾更使一道按
刑嶠南察民之冤除其殘虐則惟爾職毋重愧焉可

潘全合等轉官

勅具官某爾等知仰王明奉琛效順有嘉其意序進厥
官往其欽承益思自飭可

朱敦儒除祕書郎

勅具官某漢家得人之盛史氏所稱考之於事猶有恨
焉廷有大議諸先生莫能言盜發境外見文人無可使
豈亦儲養之不豫哉朕自艱難以來首開冊府以收衆
俊庶幾人才足用比隆於古爾老於文學器度不浮丞

郎位高實治省事簡求其稱僉曰汝宜尚勵爾修以須
採擢可

吳彥璋除太府寺丞

勅具官某太府掌貢賦之事受其貨賄之入以時出之
丞視列卿之屬其任惟劇以爾才識精敏無施不可召
自乘軺還歸班著往佐而長益懋乃猷可

陳賓卿太常博士

勅具官某列屬奉常為時遴選蒐補禮文之缺導揚升

降之儀以爾問學淹該論議不苟俾居厥次必有可觀
尊爾所聞見之行事可


張澄除徽猷閣直學士依舊知臨安府

勅眷惟帥守視古諸侯德施於民禮有加地進律之賞
效見於事史有增秩賜金之文匪惟勸功亦以久任且
使斯民服習其政而知所畏慕者也具官某沈靜有斷
疏通不浮敏以吏能被以儒雅惟警蹕之所駐類京邑
之浩煩人所謂難爾獨甚暇採諸輿論益簡朕心躋陞

筵閣之華仍俾左符之重知勞而授有榮耀焉尚究迺
心以圖稱塞可

林叔豹除江東運判

勅具官某使者之任寄朕耳目號稱外臺維持紀綱以
肅所部若御史執法日臨其前姦欺屏息無敢蘖芽則
雖四方萬里之遠朕可以無憂矣況於邇乎爾文學志
行自輩古人攬轡澄清不待多訓轉輸之責邦計是資
爾尚勉之江吳壤連朕聽不遠將于是觀政焉可



茗溪集卷三十九

欽定四庫全書

集部

茗溪集卷

四十五

詳校官左中允_臣瑋五珠

主事_臣呂雲棟覆勘

總校官知縣_臣楊懋珩

校對官主事_臣張培

謄錄監生_臣金均

欽定四庫全書

茗溪集卷四十

宋 劉一止 撰

外制

趙彬除左正議大夫徽猷閣直學士充環慶路

經畧安撫使

勅朕東巡吳會西顧陝關痛疆事之繹騷念遠臣之睽
隔逮此輿圖之復始聞音驛之傳可無渙恩昭示至意
具官某負絕羣之器茂經遠之才身蹈險艱歲月滋久

心存丹赤始終不渝仰周室之中興幸漢官之復見封
章首至誠悃昭然茲用歎嘉載頒寵賚摠一道兵民之
寄恭五官英俊之游于爾有光豈予敢吝噫以安以治
在威德之並行惟孝惟忠見君親之兩重祗服明命益
懋壯猷可

劉昉除祠部郎官陶愷除金部郎官

勅具官某朕簡求實能分任庶政爰重諸郎之選以清
列宿之行爾等才識之優論議之懿見於已試甚有休

聞茲錫贊書以爾昉治邦禮以爾愷治邦財尚勉之哉
無忝朕命可

王松改轉敦武郎

勅具官某爾奮身戎行以勞見錄并陞官秩是曰異恩
益勵後圖無羞朕命可

樓炤磨勘轉左朝奉大夫

勅朕操八柄以馭臣用三載而考績爰定進階之典以
為經久之規凡厥有官率由此道具官某識洞今古學

通天人擢自時髦偏儀要路更兩禁腹心之重司內朝
典冊之嚴會課三銓頗念服勞之久進官一列茲惟錫
命之新益懋猷為嗣有褒寵可

樓焯除端明殿學士簽書樞密院事

勅天武地文所以妙生成之化左仁右義所以行威德
之權深惟撥亂之原實在本兵之地體隆參伍位亞疑
丞敷求得人茲朕有命具官某惇大篤實疏通敏明學
博古而通今氣絕羣而邁往蹈履聖賢之域從容禮義

之間大冊高文悉出其手崇論宏議有補於時力佐中興功居大半蔽自朕志申錫賚書爰陞祕殿之華進貳樞廷之重併加徽數庸示寵私噫留公在朝已覺強藩之悔過干木為政豈止諸侯之息兵尚殫不貳之謀以永無窮之聞可

陳桶除福建路轉運副使

勅具官某朕惟在昔之君為官擇人非特量才授職而求其稱焉抑威畏所加一方之人素所服習而愛慕畏

仰之則令行禁止朞月而已可也況於久乎爾文學行義照映朝紳鄉自近班出臨閩郡越數歲矣民思之若父母然朕于是知因任之道莫此為先惟時將輸肆復命汝庶幾毋怠吾事且慰彼民爾往茂哉可

吳表臣兼侍講

勅朕承祖宗之貽訓紹金華之絕業爰開經幄燕見近臣維繹至言考質疑義庶幾講習之學與子大夫共之以爾具官某行如古人學探聖域論議雅奧實獲我心

是用陞爾勸講之官益廣舊聞非但舉行故事而已爾其懋哉可

馮楫兼侍講

勅天子之學謂之太學自致知格物誠意正心推而上之至于明明德於天下非但離文析字分別異同類章句儒而已也以爾具官某行誼高潔不替家風論議淵源率有師祖錫以贊書之寵俾參帷幄之榮惟爾敷繹所聞見之問辯庶幾三道之要有開朕心豈不韙哉可

崇奉几筵內人掌字邢念二轉典字紅霞帔岳
不惜陳榮奴陳慶惜劉伴兒任嘉奴王大娘
等並轉掌字

勅掖庭之選必自良家女御之員實參內治爾等率義
蹈憲溫而有儀相予誠孝之思不失敬恭之指就陞秩
序是用勸勞祇服寵榮尚圖稱塞可

蔡年世任太平州通判修復官私圩田增收到
租米七萬九千八百六十三石奉聖旨轉一

官

勅具官某朕惟農天下之大本民所恃以養生者也故鄉者下營田之令督勸農之官且察其勤惰而賞罰加焉爾奉職恪虔績效著見進階一等以示寵榮尚其勉旃服此明訓可

宋輝改除應天府路轉運副使依舊權京畿都轉運使

勅具官某朕惟興王之都郊圻千里自更戎壘田萊多

荒今輿地之來歸想遺黎之鼓舞乃命膚使周爰咨諏
爾簡易純誠濟以精敏荐膺試用厥聞甚休往敷及物
之仁毋墮觀風之職至于將輸之事爾所習焉惟既厥
心嗣有褒寵可

李利用除河南府路轉運判官

勅具官某畿右一道分隸陪都異時浩煩弊於兵賦既
周星紀版圖復歸敷求忠信之良往布惠綏之政以爾
性識警敏達於事機厲志激昂行不擇利茲用付以輸

將之任爾其懋哉俾利疚日聞奸欺屏息桴鼓不鳴於閭里遺黎自勸於耕桑而公私無匱急之憂則予汝嘉是曰稱職可

右通直郎權尚書刑部侍郎陝西宣諭使周幸

磨勘轉右奉議郎

勅朕以官職之事煩子大夫用之則以公待之則以恕故於三歲進階之典苟無過咎則不棄焉而况宣力四方者乎具官某執義甚堅裋身有道服勤王事靡敢辭

難再稽積日之勞乃應序選之格雖非異數庸示至懷
尚體訓辭更思後效可

經武大夫兼閤門宣贊舍人侍衛步軍司統制
軍馬武糾依赦書內指揮轉一官

勅具官某爾有位於軍服勤既久肆因慶賚俾進官聯
尚勉之哉無忘報稱可

右武大夫魏俊換給付身

勅具官某爾有位於軍服勤既久載稽功伐錫以命書

尚體訓言更圖來效可

謝祖信權吏部侍郎

勅朕於虞書求知人任使之道而得兩言曰敷奏以言
明試以功而已然後知言之足以觀人也審矣而况見
之於行事者乎具官某學探古今之祕識窮事物之幾
粵自簡知載為御史抱純誠而不貳嫉奸惡其如仇朕
用嘉之擢登法從之聯授以天官之副非特以為寵也
銓總之任條目至煩弗究其原則予奪之公或亂於可

否之似朕於此試功焉爾其懋哉可

陳規知順昌府

勅頽陰天下名郡異時牧守多名卿賢大夫善政流風
猶有存者詔令睽隔一紀於茲今輿地之來歸想遺黎
之鼓舞兼求慈惠之長往敷布護之仁以爾具官某性
本純誠才兼文武忠以許國說以使民錫之左符綏厥
舊俗庶幾底績有當朕心書曰不剛不柔厥德允修爾
其懋焉可

廖剛磨勘轉左朝請郎常同轉左朝奉大夫

勅朕承奕世之詒謀遵有虞之遺法克施庶政執兩端而用中以馭羣臣率三載而考績爰立序遷之典是為經久之規具官某具絕特超詣之才懋篤實深醇之學升華法從為時老成載稽積日之勤乃進應階之格雖非異數庸示不忘尚勵遠猷以須後效焉可

晏敦復實文閣直學士知衢州

勅侍從之臣入則獻可替否效論思之益出則承流宣

化躬捍城之勞蓋其志在國家而不在於其身則朕之
所以委任責成與待遇優禮之意亦示無有內外之間
焉具官某養氣純全執義堅固粵從簡拔黽事功旋
居封駁之司再領銓衡之任果敢健決初無所私朕允
茲耆艾之謀未覺歲時之久抗章引疾慨莫得留爰陞
延閣之華仍俾左符之重衢當孔道股肱行朝爾見吏
民宜敷惠澤俾民服朕化吏畏爾明則為稱職尚勉之
哉可

王師心大理寺丞

勅具官某廷尉列屬議法持平非忠恕明允之士弗以
處也考擇之際僉曰汝能尚其勉之可

茗溪集卷四十

欽定四庫全書

茗溪集卷四十一

宋 劉一止 撰

外制

單孝忠昨權提舉河東常平日因賊圍太原守
禦城陷死節報國追贈五官與兩子恩澤

勅具官某昨者寇犯太原爾以部使者厲兵扞格與城
俱亡報國以身英風可想得其死矣復何憾焉錫以命
書昇官五等并錄其子尚其鑒哉可

鄭剛中充陝西宣諭司叅謀官李若虛叅議官

勅具官某朕惟關陝之民思見漢官閱日既久肆命近

弼往諭至懷惟時官僚實出遴選爾智識之明議論之

偉從容冊府

李若虛云從容省戶

譽處甚休其為朕行往佐而長

進官一等庸示寵私可

江少虞等充宣諭司屬官

勅具官某朕念三秦父老思漢謳吟為日久矣肆命近弼布宣王猷諭道德意一時僚屬考擇異能爾等咸以

才稱見謂通敏進階之典用寵其行尚其勉之可

王晞韓穆平曹雲葉光宋有黃汝礪並充准備

差遣

勅具官某弼臣將命自擇從行進秩之榮為爾光寵可
簽書樞密院事樓炤封贈三代并妻

曾祖贈職方員外郎關可特贈正奉大夫

勅朕敷求哲人與之共政既進服大任推本其先寵逮
三代蓋國之典也具官某曾祖贈職方員外郎某秉志

純篤行義甚修含光韜華初則未耀蓄積之慶益於後人是生聞孫惇大敏明用勸相我家以宏賁爾宗茲朕陞爾位秩於正三品俾告幽泉没而有靈服此休命可

曾祖母永昌縣太君吳氏可特贈恩平郡夫人勅人之為善在隱約幽閑之中知自信而已不知有他日之報也譬彼服田我度我荒既臻於成乃富厥藏雖欲謝之其可得乎具官某曾祖母永昌縣太君吳氏言行無疵禮儀有度克相君子肇開慶基有嘉曾孫為朕

哲輔圖任之始用錫渙恩正位小君疏封大郡光靈未
泯尚克鑒茲可

祖贈金紫光祿大夫定國可特贈太子太保

勅士有率義蹈禮以律其身強識博聞以昌其業而位
不稱德實浮於名流澤之長乃在後嗣較其所得孰寡
孰多具官某祖贈金紫光祿大夫某儒學起家休有聞
譽飲水厲志清畏人知然職不越州縣祿不過下大夫
再世而昌自遠有耀惟時聞孫作我良弼碩大之慶於

茲鼎來朕於是知為善之報弗克躬享固未為不幸也
東宮之孤秩視二品告於幽隧用慰爾靈可

祖母華原郡夫人郎氏特贈永寧郡夫人

勅為善之報不差毫髮而耳目所及則有遠近故議者
惑焉具官某祖母華原郡夫人郎氏婉婉肅恭動合禮
法流慶之遠在其賢孫登用之初國有彛典疏封大郡
申錫寵章嗚呼亦足以少慰矣可

祖母宜人葛氏可特贈德陽郡夫人

勅女子之行在於幽閨所不得聞也逮其積累之厚天亦必陰報之慶之所鍾再世乃大豈非踈而不失者乎具官某祖母宜人葛氏冲靜儉勤不越壺則啟相後裔秉執事樞爰䟽大郡之封肇正小君之號告爾私廟以為閭里之榮不亦休哉可

父見任右通議大夫致仕居明可特封右通奉大夫致仕

勅朕惟前代盛王靡不尊德尚齒以為風化之原故於

者艾之英上大夫之貴去位而家居者則肅然慕之見於言色况其有子位列弼臣為朕倚毗者乎具官某父右通議大夫致仕某修身為君子之儒賦政得古人之秘潔廉厲操有若冰霜公怒臨民具有矩範挂冠神武自樂邱園亦既久矣爾子某以忠恪輔朕秉執事樞謀謨之良悉由義訓逮茲圖任之始敢後褒崇之恩申錫贊書進階一列惟爾脩福鮮其比焉可

母碩人范氏可特贈碩人

勅人子之於親皆欲極報崇之典然出身事主遇合實難非其志行之修自致通顯未有無所恨焉者也具官某母贈碩人范氏淑順祇肅表於宗門克相其夫不愆禮義遺澤所逮有此哲人既進位於樞庭益侈大於厥家申錫愍章為爾光寵神靈如在其克欽承可

母碩人歐陽氏可特贈碩人

勅朕惟明倫善俗孝為之本因心廣愛政之所先顧所與二三大臣共圖風化未嘗不加意於斯焉至于褒崇

其親在典禮所當然者朕其敢有愛乎哉具官某母碩人歐陽氏婦順母慈儀於宗黨德行之闕而彌芳是

生寶臣克輔國家獨不得遂偕老之

闕

南陔之養朕

心憫焉申錫命書告於幽扃用侈爾闕子之榮亦昭我
得賢之慶可

妻淑人林氏可特贈宜春郡夫人

勅朕登進尊賢儀刑百辟觀厥身修之懿議其內助之
由故鵲巢之風有禪政化而象服之美宜畀德人倘其

命之不淑事終顯榮顧豈得無恨哉具官某妻淑人林氏稟質惠和出於巨族作配君子率義不違雖志行日修而壽祿小靳疏封名郡正號魚軒豈但舉褒崇之章庶幾增伉儷之重淑靈不泯歆此異恩可

李崇特改合入官

勅具官某爾留都之屬以職入覲敷奏所聞有嘉其勤縣進秩序雖然朕之恩汝亦數矣其思所以報焉可

李孝恭充樞密府提舉一行錢糧事務先轉一

官

勅具官某弼臣將命遠通奈關惟爾從行實以才選進
官一等是用勸勞可

呂頤浩除少傅依前鎮南軍節度使成國公致
仕

勅昔太公九十秉旄仗鉞猶未告老蓋古之大臣出將
入相以天下之重自任者身雖老而志愈篤不以退為
高不以大夫引年之禮自例也若其不幸嬰於疾疢以

筋力為請則又焉能強之哉具官某輔朕初載遭時多
虞憂勤百為終始一節屢即齋壇之拜再登鼎鉉之司
位與年高功惟德稱適故疆之未復惟元帥之是謀方
資衛社之忠遽上乞骸之疏察其誠悃匪出偽為朕不
敢以官職之事煩焉進秩一等擁節歸榮其近藥物專
精神以自輔俾爾壽域尚有後渥可

武功大夫黃仕成修武郎白彥忠秉義郎崔佺
自川陝前來行在投下機密文字各與優異

推恩仕成與遙郡刺史白彥忠崔佺轉兩官

勅具官某朕惟關隴久隔王靈逮茲音驛之通盡襲漢官之舊爾馳驅長道入奏囊封有嘉其勤錫以書命陞刺列郡是為異恩益勵爾忠以圖稱塞可

白彥忠崔佺文特進官秩

路允迪除知應天府兼充南京留守

勅闕伯之墟肇興王業留鑰之重屬於大臣粵自多虞遺黎久隔及茲十稔輿地始歸簡求慈惠之師布宣寬大之澤具官某學探聖賢之蘊識窮事物之幾被遇兩

朝嘗膺寵任逮朕初政再秉事樞志已淡于功名身自
安于閒曠眷爾土鄉之舊頗更戎壘之餘桑梓相望閭
里未改惟風俗之既稔度教條之易孚其體至懷勉恢
治具可

陳淵陳確除監察御史

勅具官某御史列職皆耳目之官非胸腹有治具足以
廣朕聰明者弗以授也爾淵論議堅正學有家法爾確
執義退默蓄養邃深朕得於所聞審矣文昌六屬政事

出焉糾其稽違慢命者以告於上而賞罰之爾之職也
尚其勉之可

茗溪集卷四十一

欽定四庫全書

茗溪集卷四十二

宋 劉一止 撰

外制

孟庾除知河南府兼充西京留守

勅入聞機政參帷幄之籌出殿方維居牧伯之任我圖
舊德用錫寵章具官某氣稟天全識周世變履險挺不
渝之操事君懷盡瘁之忠更踐居多聲華益茂頃辭輔
郡均佚真祠眷言西雒之雄實戾神州之右留鑰之寄

屬於大臣帥聞之嚴茲惟重地當風塵之初靖念條教之未孚資爾老成為朕卧護噫吏以循良為稱職政以平易而近民拊摩凋瘵之餘宣布惠綏之實祇若休命適觀厥成可

武功大夫李懷軍中探報有功特除遙郡刺史勅具官某鄉者疆事繹騷爾謹候人之職功宜受賞久乃未伸郡刺之榮是為異典往其祇服益勵後圖可

臨汝軍等處差來投進表章等兵郭思温成謹

龔宥各轉一官仍支賜錢若干

勅具官某爾等奉章詣闕跋履甚勤進秩賜金以為爾寵可

鄭昂除宗正寺丞

勅具官某司宗之臣摠攬名籍佐朕惇叙之政凡其僚屬使任惟均爾智識敏明聞於朕聽俾居厥次以觀汝能尚其勉之可

俞俟知揚州

勅具官某廣陵斗牛之樞地控淮海為一都會自昔守
臣有連率之重以爾屢試煩劇才具有餘吏畏其明民
懷其惠肆以命汝蓋不惟其官惟其人之意也爾其布
宣德澤拊其凋瘵使一方安爾之政則為稱塞可

蔣瓌兩浙運副梁澤民江西運判米友仁浙西

提舉茶鹽鄭僑年江東提舉茶鹽王榕江西

提舉茶鹽

勅具官某朕經理中原費出尚廣惟是四方賦租之入

山澤之利以佐大農部使者實總其事故於選任之際所不敢輕爾璪通練明敏聞於朕聽爾澤民莅事不苟屢試有稱其為朕服輸將之勤勿愆于素爾友仁爾僑年爾榕實業之茂咸有可觀通貨阜財惟爾之責其祗若于訓懋乃職守罔曰弗克惟既厥心書之戒也今朕亦云可

李權磨勘轉左朝散大夫進封開國伯加食邑

三百戶

勅朕頒爵制祿以為天下之公黜幽陟明以為人才之勸由左右侍從之列暨中外大小之臣稽厥歲成俾從序進具官某學探聖域才擅國華薦更內禁之嚴旋位六官之長辭榮丹陛均佚殊庭屬會課以知勞宜懋官而錫命仍加徽猷庸示眷懷毋怠爾修以須後渥可

趙需知平江府

勅姑蘓望於東南壯哉郡也地廣民衆股肱王所共理之責其選實艱非左右侍從之臣有慈惠明察之譽朕

弗以付之具官某學問邃深才識通敏歷諫省腹心之
任佐中臺政事之司名實具孚未忘簡記剖分符竹益
試爾能川陸相望朕聽不遠庶幾治效朞月有聞尚勉
之哉可

朱彪御史臺檢法官

勅具官某御史列屬從長官自擇於令中舊矣以爾志
尚清高才力强敏見於表薦人無間言欽厥攸忠以佐
爾長可

朱澣吏部郎官賀允中倉部郎官邵相戶部郎
官錢葉兵部郎官

勅具官某文昌列屬居治教政事禮刑之職以佐其長
而施行焉區別戶分責任惟等以爾澣才識超詣已試
有聞爾允中廉靜無營遇事勇決爾相有當官之譽爾
葉有行義之稱錫以贊書各事其事書不云乎功崇惟
志業廣惟勤爾往懋哉毋棄朕命可

崔佺自川陝至行在投下機密文字忠義遠來

理宜優異特轉兩官

張挽段庭珪詞云爾奉章詣闕跋履良勞序進

一官以
為爾寵

勅具官某爾奉章詣闕備見忠勤躡進官聯錫以書命於爾厚矣其尚勉之可

劉觀知瀘州

勅瀘川望於劔南壤地沃衍控臨蠻徼委寄之重選任惟艱具官某文有古風學通今事項委六官之貳仍更兩禁之嚴氣節凜然聲華籍甚我圖守帥僉曰汝宜惟

爾習於土風知民利疚布宣惠澤綏靖邊隅行乎勉之
毋墮乃力可

草上席益特贈五官依條與致仕遺表恩澤詞
勅生而有位於朝死則追賁其第此人臣之哀榮有國
之彝典也而况服在朕列為朕股肱者哉具官某學足
以濟時文足以華國識足以見形於未兆辯足以應變
於無窮唾手而取功名俛首而拾富貴迴翔要路被遇
先朝屬朕多艱入參機政智畧輻湊風采想聞繼出鎮

於坤維旋遭罹於家禍孰云去位遽歿元身以彼其才
何適不偶而天嗇之年弗與位稱朕心悼焉於是知命
有所制人力之不足恃也賜頒異數超進文階流澤及
其裔孫愍冊光于厚夜英魂如在尚克鑒茲可

推貨務都茶場監管馮延之等推賞轉官

勅具官某爾等職事告辦應於賞格進官一等是用勸
勞尚勵厥修以須後渥可

岳州通判王觀國失收摠制錢特降一官

勅具官某郡縣羨財佐國經費凡其出納蓋有司存爾
為州事其實掌斯事而漫不加省至於逸遺使至以聞
咎將誰執褫官一等姑罰其偷服我寬恩毋忘自訟可

閻丘沂權吏部侍郎

勅吏部銓叙人品激濁揚清古之制也今也一切從事
於法無所變更察吏之欺而已然吏固不易察也具官
某學行純茂智識明敏粵自臺僚進居宰屬揚於厥職
守道不回爰錫贊書俾參禁路小宰之事爾則優為惟

公足以服人惟明足以見事而予奪之制不得以疑似見欺尚勉之哉無替朕命可

陳橐權刑部侍郎

勅惟我祖宗以聖繼聖好生之德無愧有虞肆朕纂成惟刑之恤故於四方具獄來上未嘗不惕然動容懼其濫及無辜以傷列聖之德然則小司寇之任詎可非其人哉具官某學通而明氣邃而剛居家有曾閔之孝為吏有龔黃之政朕聞之審矣居於宰士閱日既多攝貳

秋官僉言惟允其體朕至訓益究乃心無使聲稱減於
治郡可

王次翁中書舍人

勅代言之任古所謂難非以文辭之難也賞善之言煖
然似春罰惡之言擎焉似秋俾朕心腹腎腸一見於訓
告誓命之間讀之者感於中而動於色知其悉出於忠
厚而無所私也於是為至難具官某學博而有原志剛
而不惑純茂篤寔遠師古人爾代予言天下不以為欺

矣矧其辭之工耶西掖遽嚴進班法從論思之益抑有望焉可

林待聘起居郎

勅具官某柱史之職實記言動魏暮之善對褚遂良之守官朕想聞其風矣庶幾其有繼焉爾志行修潔論議激昂更歷險夷執義深固名從外服俾貳列卿雖譽處之甚休念猷為之未究載頒書命進直殿坳勉追古人以稱朕意可

程克俊起居舍人

勅具官某古之盛王設敢諫之鼓立誹謗之木與夫近臣盡規瞽史教誨猶以為未至也而命柱史之官記其言動且用以自警焉嗚呼豈特為文具而已哉爾問學邃深行義純固薦更選任稍見設施進直螭坳退居鸞省儒者之遇寵莫加焉爾究乃心職思其稱無使直筆之譽有愧前聞可

曹國彥改正授承節郎

勅具官某爾奮身行陳嘗有顯勞載錫命書俾更秩序
尚思黽勉以稱所蒙可

解尅換給武德大夫

王信同

勅具官某爾以舊勞既沾賞格申以書命其益知榮可
右儒林郎張綱省劄差往海州及東平府幹事

回特與改承奉郎

勅具官某爾曩者銜命馳驅曾無廢事有嘉勤恪超進
官聯祇服異恩宜思報塞可

茗溪集卷四十二

欽定四庫全書

茗溪集卷四十三

宋 劉一止 撰

外制

范璿王銖左司郎官潘特諫魏良臣右司郎官
勅具官某文昌政事之本分曹設屬序於左右宰士總
其凡彌綸闕軼以佐其長以告於上而予奪罷行之其
任顧不重耶爾璿靜默邃深惟義之守爾銖安恬樂易
遇事必為爾特諫行顧其言有長者之譽爾良臣才周

於事有健敏之稱或以序遷或由選擢周官有云以倡九牧阜成兆民蓋六卿之責也爾則與焉其思以稱此無羞朕命可

周綱檢正晁謙之檢詳

勅具官某二省基王命之地右府本兵柄之嚴爰建屬僚總司出納庶幾習熟聞見為大用之階爾綱守道不遠持心近厚敷歷中外藹然休聲凡政令之事爾其審觀無使頗僻爾謙之名卿之胄學有家法徊翔省寺見

謂明敏凡疆場之謀戰多之賞爾悉關決以協事功其各究乃心職思其稱朕於此觀能焉可

周葵殿中侍御史

勅具官某治疾以苦口之藥疾已而藥可捐治身以苦口之言身修而言有味君子以是知言之不可忘也爾頃以文行為朕識擢既居御史知無不言言皆有益比其去也朕心思焉茲用詔除復畀言路上有他政朕所樂聞吏之多奸惟爾勿貸但朕以治已之道治人君子

進為小人退聽天下蒙福其庶幾乎可

何鑄監察御史

勅具官某御史三院共總憲綱而六察糾政令之稽遲以佐朝廷之賞罰其選惟遴爾執義蹈禮蘊藉深厚見之事業必有可觀肆朕命爾為耳目之官往其懋哉尚有後渥可

韓珉江東運判

勅具官某江左地重勢臨三吳師屯列營取給漕食爾

謹身奉法恪勤勿懈輸將之職公論謂宜至於省察吏
姦訪求民瘼此部使者所當自任毋煩訓言可

周三畏大理卿

勅具官某昔者謂廷尉天下平特以持平之難也天下
之寃至於廷尉而不得伸則控告無所矣夫豈容於不
平爾迴翔諫寺有年於茲議法不私處心近厚人無間
言是用正位九卿以旌爾勤嗚呼張釋之于定國何人
哉爾其盡心奚遜之有可

向宗厚吏部郎中

勅具官某時巡以來典籍散逸選曹品式幾亡勤守雖有憶之文稍從編次而予奪之例出入尚多以爾執德清夷宅心堅正踐更中外譽處甚休我圖老成俾還省戶夫豈特重三銓之寄亦庶幾清列宿之行益懋爾猷毋俟多訓可

李迨京畿都轉運使

勅朕慨念舊都中更戎壘封圻千里田野蕭然比命迨

臣往司管籥可無膚使省觀民風具官某才足以應時
須智足以周事變薦膺選任名實具孚朕簡求侍從之
良增重轉輸之寄布宣至意有若親臨歛薄施豐惟其
僅足嗚呼爾無以鍼砭為遠惟拊摩之是先爾無以斧
柯為功惟萌芽之是察勉修厥職以副朕心可

環慶帥臣趙彬遣敦武郎張允弼進本路圖籍
等特與轉兩資

勅具官某爾奉章詣闕跋履修塗有嘉其勤進秩二等

服此光寵益勵厥修可

趙令衿福建提刑

勅具官某法弊於吏所從來久楚漢之法非亡也而或為之上下其手輕重其心則雖曰法存不已廢乎爾宗胄之良見謂清審出入中外多所踐更攬轡一方其為朕察其所由然者一切以柱後惠文彈治之俾民自以為不寃則為稱職爾其毋怠可

王述監永通監日欺隱官物累年不行送納特

降一官衝替

勅具官某爾受郡國羨財入於泉府乃敢稽違不以時上原情議法罪其可逃貶秩免官茲亦恕矣可

吳偉明除直秘閣應天府路提刑

勅具官某梁宋之區封圻千里創殘十稔版籍始歸比命邇臣往司留鑰可無膚使省觀民風以爾靜正寡言循良近古輟從治郡易畀列臺考之于詩蓋忠信之人是任授之以職惟刑辟之事是專刑乃期于無刑訟必

使之無訟何以臻此爾其懋焉庶幾慈惠之風不辱闕
華之命可

陳遠猷除四川轉運副使

勅具官某全蜀之饒弊於兵賦茲有年矣朕心憫焉簡
求忠厚之臣往任轉輸之寄爾通才識變敏識絕人更
踐煩劇厥有聞譽輟從帥幕就畀使軺饋師牧民悉惟
汝責通融之妙其必有方非朕所能知也知汝責而已
尚其勉之可

曾楸知潭州

勅長沙居湘川之奧人豐土闢南通嶠嶺唇齒荆雍分
閩之任朕不敢輕具官某篤寔純明疏通將畧名德之
懿表于縉紳早辭法從之班久袖經綸之手時方謀帥
允屬老成茲朕付爾荆湖一都會之雄封疆數千里之
廣惟所節度有兵有民勉思其艱以圖其易威德兩濟
時乃之休可

仇愈除寶文閣直學士陝西都轉運使

勅朕惟三秦之地雄視九州臨遣漕臣自昔任重矧茲
王畧始及舊疆必求忠信之稱往布惠綏之實具官某
才能卓偉問學淹該識每洞於幾微及可施於盤錯眷
關隴乖睽之久屬干戈蹂躪之餘餽師牧民觀風問俗
澄清攬轡非汝孰宜陞內閣之崇資增使華之重寄送
之以禮式勉其行嗚呼爾惟參朮之是施勿攻以毒爾
惟狼莠之是去勿剪其良服我訓言益思其稱可

向子諲轉一官致仕

勅樂于進為則以逢時是幸安於靜退則以得去為榮
鐘鼎山林各存志慕朕又烏能必以官職之事累之哉
具官某修潔博習甚敏而文勵行砥名自殊肺腑閱歷
多故勤勞百為頃辭法從之班出領輔藩之重浩然請
老去不待年結社香山豈特棲心於澹泊角巾東路殆
將卒歲以優游賢哉大夫自此遠矣進官一等用寵其
行服我訓辭益綏壽祉可

呂頤浩贈太傅

勅砥節礪行者為臣之能事追往厚終者有國之大經
矧惟耆艾之英實受股肱之託可無愍冊以寄予哀具
官某氣稟純全學探蘊奧通出將入相之略有經文緯
武之才慷慨百為周旋三紀袞衣赤舄再登揆路之崇
玉節琯戈屢即齋壇之拜事書勲府名在史官辭富貴
而勿居處山林而寄傲比欣入覲旋復戎行慕赤松之
高蹤返東蒙之舊隱僅踰浹日遽殞元身念一老之不
遺固中心之是悼肆頒徽數正位上公惟誠意之可通

尚光靈之未泯可

茗溪集卷四十三

欽定四庫全書

茗溪集卷四十四

宋 劉一止 撰

外制

劉昉除禮部郎官張擴祠部郎官朱敦儒都官

郎官

勅具官某文昌政事之本分曹列屬其職雖異要其胸
中皆有治具然後授之如昉才高識明論議不苟如敦
儒擴停涵蓄養邃於學而妙於辭蓋一時之選禮刑之

事爾等習焉毋俟多訓可

宋棐除江西運判蒲贄湖北運判曾律淮東提

舉茶鹽

勅具官某經費之重實在大農而賦租之入山海之利繫於邦國者惟部刺史者是貴其選宜遴爾棐爾贄術業屢試綽有能稱茲用付以輸將之事爾律名家之子甚敏而文通貸之機實宜受任朕惟江湖淮海之區利孔所出蓋非一端所不欲聞也責爾等者經費而已可不

懋哉可

蔣汝翼特與補正左奉議郎依舊通判涇州府
勅具官某爾係心王室悔罪而歸奔走鼎來叩闈自列
朕念華夏本吾臣民洗滌舊污被以新寵俾還厥職仍
正官朕其深體於厚恩益自期於忠孝可

忠訓郎董言管押馬綱稽留作過特降一官仍
依衝替人例施行

勅具官某爾以右牽之事稽留道途乃官其私事在必

罰免官貶秩茲謂小懲其尚循省可

劉才邵除秘書丞李百藥秘書郎

勅具官某冊府士之冀北追風汗血之駿在焉識者朝暮而取之無留良也爾等召自外服問以所知論議切至有當朕意丞郎之職其選甚高往厲爾修以俟識拔可

上殿人鄭邦哲與循兩資令還任

勅具官某爾往從而長將命隴蜀選奏所聞通練明敏

進階二等用答爾勤可

左宣教郎任紳乞以所轉左奉議郎一官封母

劉氏與封孺人

勅具官某母劉氏朕因擴心之教惠於百辟不愛爵賞以風厲之矧其有子孝如閔顏且欲以官秩之寵易俾其親者乎惟爾修身與其教子不待言而信矣疏封之典其尚知榮可

左承議郎鄭穀除御史臺主簿

勅具官某御史府風憲所在其屬皆一時異選簿領鈎稽之職非他有司比也爾志行老成謹厚通敏俾居厥次公論謂宜尚勉之哉可

邵溥磨勘轉左朝議大夫

胡舜陟辭自具官某才識精敏論議激昂

中外踐更休有譽處其餘上下詞同邵溥

勅朕著考績之令校功數最一本至公雖侍從之臣禮遇有異而積日聽遷厥叙惟等具官某才識超詣論議有餘經學傳家典刑未泯奉祠均佚亦既淹時會課三

銓就官一列雖非異數庸示眷懷可

葛勝仲磨勘轉左正奉大夫

勅上詞同
邵溥

具官某文學志行表於縉紳進退雍容不愆

禮義奉祠均佚亦既淹時會課銓曹正秩三品優賢求
舊庸示不忘可

郭仲荀兼營田大使

勅昔趙充國馳至金城圖上方畧願罷騎兵為營田之
策雖璽書詰責屢至不移於是知賢人君子之忠於謀

國不顧其身有如此者魏置典農而中原富貴晉開汝
潁而河汴委儲足國裕民茲為根本付委之任謂可非
其人哉具官某頃以真才首膺異選往司管鑰綱紀舊
都眷輿地之始歸慨田疇之未墾肆頒新渥崇建使旌
爾惟深體朕心考稽事實俾規制一定功利可期無使
營平專美有漢則予汝嘉可

劉無極除知大宗正丞

勅具官某朕以司宗之職付之伯臣而置丞以文士由

其政令以敦叙屬籍且教且治之爾無極學有本原語
妙天下蘊藉之懿無施不宜勉服厥官以湏後渥可

毛敦書除大理正丞

勅具官某獄者人之司命而廷尉之事四方取則焉選
於時才以爾為正蓋鄉之亞非其旅也勉修厥職稱是
寵休可

向伯奮起復充河南府留守司叅議官

勅具官某朕念畿右重地久隔王靈肆命弼臣往司管

鑰惟時僚佐選任實艱爾心計有餘屢更煩使起之苦塊要經以從孝有移志具存古訓勉祇厥事爾無恨焉可

劉式章蘊差充留守司官準備差遣先轉一官

勅具官某

上詞同前

爾等咸以才猷權居幕府進官一等用

寵其行尚勉之哉無忝朕命可

陶愷除司農少卿

勅具官某司農總倉廩委積之事受而尸之稽官吏官

掖賦粟鍾庾之數以時出焉任至劇也爾才識通敏心計有餘俾亞列卿公議惟允勉修厥職嗣有寵褒可梁喜分路催發回易錢稽違不往特降兩官勅具官某爾受檄以出閱歲乃還事效蔑然惰偷失職褫官二等以示薄懲可

謝祖信除徽猷閣待制知潭州

勅長沙為一都會襟帶湖湘唇齒荆雍地廣物夥甲於他路帥守之責選任匪輕具官某學富而文雄才通而

識敏論議之偉見於告猷究觀規模朕所倚辦茲用輟
自禁近俾殿南服假以握符之重仍陞次對之華服我
茂恩益圖乃績無使智畧不稱在前可

范振除江西提刑

勅具官某部使者之職寄朕耳目選用之際所不敢輕
以爾振經學邃深文詞溫麗施于政事亦復絕人輟自
望郎往司刑憲夫為朕廣好生之仁諭哀矜之旨使四
方司政典獄欽恤明允民用不寃茲非俗吏之所能為

也爾往懋哉毋棄朕命可

曾楙改知信州

勅朕以牧養之政寄之郡守慮百姓疾苦壅於上聞而上之德澤弗克下究嘗惕然憂未嘗愒然忘也共理之責顧不重哉具官某法從老成道廣器周功利及物隨所施用上饒為郡居四達之衝有山谿之勝土風俗習可問而知矧兄弟分符疆連壤接魯衛之化宜相後先朕於彼民可無憂矣可

茗溪集卷四十四

欽定四庫全書

茗溪集卷四十五

宋 劉一止 撰

外制

胡交修除兵部尚書兼權翰林學士

勅朕惟自昔聖哲之玉所以戡難定功救寧方夏豈特
神靈威武所變化莫敢侮予抑亦訓誥誓命之恢洪不
匿厥指故于簡在文武之懿列於侍從之班未嘗不當
饋興嗟想見其人而用以自助者也具官某器周而用

博學茂而辭雄早以重名偏儀要路粵自禁林之近旋
居常伯之尊守道不回孤忠自信朕慨念典刑之老又
安湖海之游爰錫贄書併還舊物總司戎之政令兼視
草之雍容事絕前聞茲從近比庶幾一舉而美具焉頗
牧在於禁中燕許擅其手筆惟爾得位惟朕有臣豈不
休哉可

譚知柔除大理少卿

勅具官某朕哀矜庶獄明審用刑與其殺不辜寧失不

經爾宜知之熟矣其亦識朕遷序勸功之意乎爾中外
踐更智識通敏俾貳廷尉益究厥能傳曰刑者例也例
者成也一成而不可變故君子盡心焉朕之訓言於是
乎在可

趙不退轉右奉議郎

左迪功郎趙善
時循資詞同上

勅具官某國家以三歲之舉網羅羣彥爾宗子之秀刻
意藝文與寒畯等遂膺賜第朕心嘉焉躡進官聯以為
爾寵抑以為爾曹之勸可

陳良能母李氏年九十以上特封太孺人

勅李氏朕歛時五福敷錫萬方存勞百年被以恩禮爾積行閨壺克享上壽朕心嘉焉錫之命書以榮其老抑以為年高德邵者之勸可

吏部員外郎向宗厚通理知州資序合陞郎中勅具官某尚書列曹於今為重非秩視郡守則皆員外置也爾出入中外多所踐更砥節礪名休有譽處再居省戶正位中郎益懋爾猷以稱茲寵可

向宗厚除浙西提刑

勅具官某爾昔以尚書郎出刺浙右忠厚明察身正而令行民安而俗不偷朕因任羣才無間中外茲復命汝往司刑憲乘輅之寵仍異固封雖曰外臺實在轂下爾毋以不得居中為恨焉益勵厥修以俟寵擢可

京畿都轉運使司屬官李閻之等循轉官資

勅具官某朕簡求漕臣經理畿甸凡其僚屬聽以名聞爾等獲在選中以才自奮進官一等等以寵其行尚勉之

哉可

晁謙之除右司郎中陳正同除樞密院檢詳

勅具官某中臺萬化之原右府本兵之地其屬皆一時
妙選而省觀出納以佐其長則有總司其凡者焉爾謙
之才高識明見於屢試爾正同志行粹美克世其家夫
邦國之政疆場之事爾悉關決而罷行之其責重矣盍
思所以稱是哉可

賀允中吏部郎官劉景真倉部郎官姜師仲刑

部郎官許忻吏部郎官陳膏工部郎官

勅具官某文昌郎吏分掌天下之事雖任有劇易位有等差而選用之艱爾等宜知之矣亦無所以致此與遷叙之意乎志節清厲如允中行義堅正如景真師仲忻已遠於聞譽膏也敏於吏能不如是朕不以輕授也詩曰靖共爾位好是正直爾等居其位則思所以稱焉守此兩言而已可

逢汝霖利州路運副徐天民廣東運判趙不凡

淮東提鹽陳正由福建提舉茶事

勅具官某郡邑之賦山澤之利以佐大農部使者總其政令稽其出入多寡之數以告於上賞勉而罰偷其事重矣爾等皆以才選分任一道輶車之出遠而有光其思所以稱焉可

林待聘除中書舍人

勅代言之重自昔所難眷予復古之初將開右文之化與司名命允賴雋人具官某識茂而明學通以博項更

簡拔備見猷為豈惟優世叔之討論抑亦妙君房之言
語輟自柱史進居掖垣雍容清切之班焜耀寵靈之渥
嗚呼予欲德意志慮追三盤五誥之風予欲號令文章
新四方萬里之聽攄爾素蘊毋羞前聞可

周綱除權吏部侍郎

勅自昔銓選有任人任法之殊非予奪不公則賢愚同
滯得失相混未知孰賢惟我國朝循用唐制著為資格
以為利人而病法孰若因舊而法存遴簡官曹典司其

事檢察吏欺而已具官某蘊有用之學負能為之才凡所踐更皆有可紀刃每施於盤錯操不易於風霜比自近藩入專宰屬雖稍聞於論議殊未究于設施攝貳天官進班法從茲為異數庸示眷私服我訓辭職思其稱無使居中之譽減於治郡之時可

蘇攜除太常少卿

勅具官某朕惟艱難以來制度多闕豈惟思得博洽之士蒐補異聞而敷錫萬方存勞百年被以祖宗舊典亦

欲訪之故家庶幾文物之盛無所愧焉爾志行得於心
誠學問由於世濟更閱浸久論議有餘往貳典臺莫如
爾可永懷先正凜然風烈之高喜見後人尚有典刑之
似勉修厥職以稱簡知可

利州路運副鈞光祖落職放罷降一官

勅具官某爾為漕臣提司金穀出納之吝在所當先而
法守蕩然擅行貨易成案來上朕何敢私褫職貶官以
戒不敏可

汪藻磨勘轉左太中大夫

勅虞舜三載考績之法成周因之大計羣吏其詳莫得聞焉後世遵用以為序進之典務適厥中而已具官某法從之懿為今老成聲華曼絕於一時出處不愆於素履奉祠真秩閱日既多會課三銓進官一列雖非異數庸示不忘可

李唐孺除直徽猷閣陝西路運副陳古除直徽猷閣秦鳳等路提點刑獄鮮于翰除直祕閣

永興軍路提刑

勅具官某秦隴之地睽隔生靈於今十稔朕懼夫刑政之類有未盡更賦役之苛闕闕蠹尚在選任使者固將安之且寄朕耳目者也爾唐孺爾古爾翰材術之偉見於屢試分行一道省觀風謠求利疚之所以然悉以上聞俾朕之德澤得以下究茲非耳目之任所當為哉爰升延閣之華式重輅車之寵往其祗服益懋厥猷可

四川轉運副使陳遠猷除右文殿修撰張深除


直徽猷閣並兼陝西路轉運副使專管熙秦
兩路

勅具官某書殿延閣寓直之名所以勸功而懋德授受之際朕不敢私以爾遠猷智識之明爾深聲實之茂增隆寄委茲用序遷夫秦蜀之饒有無相足乖睽十稔始還其舊民物利疚兩地惟均爾等所宜知也轉輸之任其為朕并任之取諸濟而已尚勉之哉可

張燾權吏部尚書

勅天官位六卿之長尚書摠三銓之政資格既定古法
寢亡而辨流品專予奪抑貪冒進賢能無所與焉朕思
得端亮之臣冠於法從俾激濁揚清之旨見於論議舉
措之間而百吏凜然向風知所畏慕則銓綜之妙有不
待法而存者顧不偉哉具官某宅心高明養氣剛大文
足以起俗習之陋學足以探聖經之微閱時艱難引義
忼慨有言必盡遇事不辭念裨益之居多亦迴翔之既
久攝居常伯茲用序遷尚體訓辭益思砥礪惟爾得盡

忠之譽則予有知人之明可



茗溪集卷四十五

欽定四庫全書

集部

茗溪集卷

四十六至
五十

詳校官左中允臣瑋五珠

主事臣呂雲棟覆勘

總校官知縣臣楊懋珩

校對官主事臣張培

謄錄監生臣金均

欽定四庫全書

茗溪集卷四十六

宋 劉一止 撰

外制

馬純江西運副

勅具官某大江以西地稱沃壤賦租之入視他路為多而艱難以來使者數易鮮克勝其任者以爾達練明敏智術甚優博識多聞論議衮衮茲用命爾往司漕計事無劇否惟才是須行爾所知則有餘地尚勉之哉可

上殿鮮于參典改合入官

勅具官某朕燕見臣工訪求民瘼雖隆寒盛暑不敢自暇庶幾廣覽兼聽有裨治道爾以孤遠入對殿中論議詳明有當朕意進更官秩是為異恩其勵爾修以圖稱塞可

王利用成都府路提刑

勅具官某御史出領外臺挈持憲綱以肅所部蓋累朝故事示中外為一體也爾居三院分糾六曹守道不回

見謂稱職夫刑辟不苟用也刑期無刑辟以止辟五禮之教存焉經不云乎士制百姓於刑之中以教祇德其體茲訓以圖厥中可

王璧秘書省正字

勅具官某以言取人尚矣朕又網羅博洽能文之士習為典章復其科目以別異之爾在選中既閱歲矣禁林發策酬對衮衮亦復可觀夫道山藏書之府朕所以養賢而待問爾往讀未見之書增其所聞揚推古今令可

施用無自畫焉可

李維浙東提刑除直秘閣

勅具官某朕於遣使授指未嘗不訓告煩悉而况刑獄之事乎漢景之詔曰獄人之大命死者不可復生言至切也爾學古入官為時望仰顧平昔講論必有得朕心之所同者與其殺不辜寧失不經不易此言矣寓直中秘以寵爾行往其懋哉可

徐俯知信州

勅入聞機政參帷幄之籌出鎮坤維居師帥之任我圖
舊德茲錫贊書具官某道廣器固才雄識敏文章至於
剛大之氣問學得於深湛之恩粵自艱虞召還禁近屢
罄謀猷之益旋登宥密之司謝公實賴於同憂汲黯固
優於補過浩然辭位久矣奉祠觀鐘鼎猶山林豈特棲
心於澹泊以翰墨為主客殆將卒歲以優游惟是上饒
號稱名郡教條簡肅足以綏彼遠民巖壑覽觀足以休
其暇日往欽成命毋或留行可

卷四十六
曾幾廣西運副呂用中福建提舉茶事

勅具官某閩嶠去朝廷遠郡縣之吏玩治病民視部使者能不能以為廉貪勤惰其來久矣爾幾文學志節出入數等爾用中識慮明審達於事情茲錫贊書分行一道耳目所及靡有逸遣使彼遠民不病於吏則為爾能轉之勤摘山之秩爾等所能習聞也成法在焉勉之而已可

程克俊起居郎王鈇起居舍人

勅具官某朕設左右程史之職簪筆殿坳言動必書實
用自警非但率循故事而已選任之重異於庶官惟克
俊鈇博物能言絕出倫類檢由識耀克俊次遷蔽自朕
心式昭寵遇勉之無斁將觀爾能可

隨龍慶國柔懿淑美保慈夫人吳氏上遺表特
贈柔懿淑美端靖肅恭保慈夫人

勅朕隆思念舊追往厚終眷惟慈保之勲敢後哀榮之
典慶國某夫人吳氏婉嫻淑美端莊裕和行悉中於壺

彛言不踰於內則儀型禁掖居有令名擁佑眇躬至登
大寶念艱虞之方靖固康樂之是圖庶安鐘鼎之榮遽
覓壑舟之遠愍章雖寵顧莫寫於予悲素號有加冀益
昭於爾德惟光靈之未泯尚誠意之可通可

祝師龍太府寺丞

勅具官某太府之職出納邦財丞於其間事任惟劇爾
才能小異達於聽聞往服厥官以佐爾長可

故保慈夫人親屬孫女雍氏故男新婦陳氏並

封孺人

勅某氏眷惟保慈之德實佑朕躬奄其云亡中心是悼
疏恩之典并及懿親祇服寵休毋忘所自可

故保慈夫人本位官承節郎代手分蘇練特與
轉兩官

勅具官某眷惟保慈之德實佑朕躬奄其云亡中心是
悼疏恩之典下及儲胥祇服寵休毋忘所自可

范同除檢正

勅具官某兩禁腹心之地帶轄萬務賦於中臺爰置屬僚總司其出以爾同學問淹貫志行卓偉更閱既久聲稱蔚然稽於羣言宜在茲選嗚呼命令之出實艱厥初毫釐之差繆以尋丈爾居其位職思其稱焉勉之毋忽可

朱松吏部郎官張宦司勳郎官喻汝礪駕部郎

官

勅具官某中臺總天下之政列屬分曹序於左右既重

其選旋以次遷將使明習憲章周知其故則朕儲蓄待
問不為無人惟松與宦一時之望汝礪召自避服敷表
可觀茲錫贊書各事其事無使來效有愧朕言可

陳昱大理寺丞

勅具官某獄重事也人有智愚官有上下獄疑者讞至
移廷尉則他無所控告矣今命爾往為之屬以觀厥能
俾民自以為不寃則為稱職可

楊邁知夔州

勅具官某夔居楚蜀之間控臨三峽是為咽喉之地建
牙分閫重於他邦爾邁敏識絕人通才識變更閱既久
譽稱其實我圖帥守僉曰汝宜綏靖兵民布宣惠澤汝
之職也往其懋哉可

王次翁工部侍郎

勅宮室器械之政營田山澤之令名在冬官職存事典
惟時卿貳選任匪輕具官某行稱其言識根於學頃自
柱史擢居掖垣謀猷早鄭國之討論制作得漢家之深

厚迴翔既久進秩是宜疇若予咨莫如汝可往欽成命
無替厥終可

程克俊中書舍人

勅柱史記言動之官中書基命令之地非一時之傑不
與選掄而兩禁之嚴均為邃密茲錫贊書之寵序陞法
從之功具官某志行不羣論議守正履聖賢之間闕咀
典籍之英華發為文辭最宜訓詔服我新渥攄爾舊聞
予欲觀仲舒之古風見於有作予欲問崔琳之今事益

所未能勉追昔人以稱朕意可

周葵起居郎

勅左史載筆職在記動進直螭陛退居鸞臺是惟儒者
一時之榮以爾葵執德清夷秉心端亮兩居御史風節
凜然有藜藿不採之風見松栢後凋之操引以自近益
觀厥猷我乃正心爾無曲筆庶幾終譽不愧前聞可

李仲孺知廬州

勅具官某合肥地控江淮為今重鎮搶攘之後民物尚

繁必得一時通敏之才付以千里帥守之任爾罷能宏
博論議激昂奉使典州所臨底績易俾方面以究爾長
詩曰不剛不柔敷政優優又曰豈弟君子神所勞矣服
我明訓毋失厥中可

茗溪集卷四十六